

## 2 TESALONICENSES ICA OME ITLAJCUILOL ON APÓSTOL SAN PABLO PARA ON TESALONICENSES

*Pablo niman itequipanoj caxihuan quintlajcuil-huiyaj on tlaneltoquej ne Tesalónica*

<sup>1</sup> Nejhua, Pablo, ihuan Silvano niman Timoteo, niquijcuilohua yejhua in tlajcuilolamatl para on tocnihuan ne ipan on tiopan yejhuan oncaj ipan on hueyican Tesalónica. Niquijcuilohua in tlajcuilolamatl para on yejhuan nemij itech Dios toTajtzin niman toTeco Jesucristo. <sup>2</sup> Ma Dios toTajtzin niman toTeco Jesucristo ma mechmacacan hueyi tlatiochihualistli niman yolsehuilistli.

*Dios quintlaxtlahuilis on tlajtlacolejquej ijcuac  
Cristo huajlas*

<sup>3</sup> Nocnihuan, nonequi nochipa ticmacasquej tlaxtlahuilijli Dios nemopampa. Yehua in cuajli para ticchihuasquej, pampa nemotlaneltoc más noscaltijtiu, niman on tetlajsojtlalistli\* yejhuan cada se nenquipiaj inhuan ocsequimej más hueyixtiu. <sup>4</sup> Yehua ica, sa no tejhuamej titenojnotzaj de nemejhuamej ican paqulistli nochihuiyan ipan on itiopanhuan Dios. Ticteijliaj on ijyohuilistli niman tlaneltoctli yejhuan nemejhuamej nенquiteititiaj intzalan on tetlahuelitilistli niman tlatlamach tlajyohuilistli. <sup>5</sup> Yehua in mechtitia ica

---

\* **1:3** amor

Dios nochipa quichihua tlen cuajli, pampa itech-copa on tlajyohuclistli nemochipahuaj para huelis nencalaquisquej ne campa Dios tlamandarohua.

<sup>6</sup> Dios yolmelajqui niman quimati quen ijqui cuajli para quintlajyohuelltis on yejhuan mecht-lajyohuiltiaj. <sup>7</sup> Niman Dios no quimati quen ijqui cuajli para mechmacas nesehujli neme-jhuamej yejhuan nentlajyohuijtoquej ijcon quen tejhuatej techmacas. Niman in nochihuas ijcuac ajsis on tonajli ica toTeco Jesús huajnonextis ne ilhuicac itlajcotian titl ihuan ipoderosos il-huicactequitquej†. <sup>8</sup> Huajlas para quinhuajcas-tigaros on yejhuan xquixmatij Dios niman on yejhuan xquitlacamatij on temachtijli itech ica toTeco Jesucristo yejhuan quitemaca temaquix-tilistli. <sup>9</sup> Yejhuatej quincastigarosquej ican xox-otonilistli para nochipa, niman huejca cominx-inisquej de itech toTeco, niman ihueyilis niman ipoder. <sup>10</sup> Ijcon nochihuas ijcuac toTeco huajlas ipan on tonajli para quihueyilisquej on iyaxc-ahuan‡ Dios, niman no ijcuac on yejhuan oquinel-toquej Jesucristo paquillachasquej yejhua itech. No ijqui nemejhuatej nennemisquej in-huan pampa onenquineltocaquej toteixpantilis.

<sup>11</sup> Yejhua ica in nochipa ticchihuaj oración nemopampa. Tictlajtlaniliaj toDios ma mechchipahua ijcon quen omechnotz, niman ican ipoder ma quichihua noch tlen cuajli ijcon quen onenquitlalijquej nemoyojo itech. No ijqui tictlajtlaniliaj para ican ipoder ma cuajli tlami

---

† **1:7** ángeles: Angeles tequitij ne ilhuicac niman nican ipan in tlalticpactli. ‡ **1:10** le pertenecen; iaxcahuau, ihuaxcahuau, itlatquihuan

nemotequiui yejhuan nenquichihuaj pampa nentlaneltocaj. <sup>12</sup> Ijquin, tej, itocatzin toTeco Jesucristo quiselis hueyilistli nemopampa, niman yejhua no mechhueyilis ican iteicnelilis<sup>§</sup> toDios niman toTeco Jesucristo.

## 2

### *Nopantlantis on tlajtlacoltlacatl*

<sup>1</sup> Aman, nocnihuan, temechijlisquej yejhua ica on ijcuac huajlas Jesucristo niman techsent-lalis itech. Sanoyej\* temechtlajtlaniliaj <sup>2</sup> ma ca nimantzin nenometlamatisquej. Ma ca yacaj nemocahuilisquej mechtlamachilispolos yejhua ica on tlajtojli yejhuan quijtos ica on tonajli ijcuac ilhuiu toTeco yopanoc. Ma ca nentlamachilispoli-huisquej tla saman yacaj omechijlij in ican se tiotlajtojli yejhuan quitenehua quiselia itech Dios, noso ican temachtilistli, noso tla saman yacaj mechijlis ica in tejhuamej otiquijcuilojquej ipan se tlajcuilolamatl. <sup>3</sup> Ma ca yacaj xmocahuilican it-laj ica mechcajcyahuas, pampa achtopa ijcuac xe ajsi on tonajli ica oncaj achtopa miyequej sanoyej xtetlacamatquej yesquej itech Dios, niman ijcuac nonextis on tlajtlacoltlacatl yejhuan quitlajtlacol-macasquej para quiselis xoxotonilistli. <sup>4</sup> Yejhua quixnamiquis niman noquetztehuas para ipan nochí yejhuan quipia itocatzin Dios noso on tlen on tlacamej quimahuistiliaj. Niman ijqui onotlalis ipan itiopan Dios quen melahuac yejhua yesquia Dios, niman sa no yejhua notenehuas Dios.

---

§ **1:12** su misericordia   \* **2:1** mucho

5 ¿Xnenquelnamiquij ica ijcuac oc† ninemiya nemohuan nemechijliaya nochi yejhua in?  
 6 Niman aman nenquimatztoquej tlinon quiteltia on tlajtlacoltlacatl para ma ca huajlas más saniman ijcuac xe ajsi on tonajli cuajli para yejhua. 7 Amantzin on xtetlacamatilistli ye tequiti san ichtaca‡. Pero on yejhuan aman quiteltijticasj on xtetlacamatilistli san polihui quejcuansquej iyecapan. 8 Niman quemaj huajnonextis on tlajtlacoltlacatl, niman toTeco Jesús quimictis ican ijyo yejhuan quisa ipan icamac, niman quixoxotonis ican ipepetlacalis ijcuac huajlas. 9 Yejcos on tlajtlacoltlacatl ihuan ipoder Satanás. Niman yejcos ican nochi poder, niman tlamajhuisoltin, niman milagros yejhuan tecajcayahuaj. 10 Quiteititis miyec tlajtlamach§ yejhuan xcuajli para yejhua ica quincajcyahuas on yejhuan yahuij ipan xoxotonilistli. Yejhuatej xoxotonisquej pampa xoquiselijquej on tlen melahuac para nomaquixtisquej. 11 Yejhua ica in, Dios quincahuilia ma nocajcayahuacan ica on tlacajcayahualistli para ma quineltocacan on tlen xmelahuac, 12 niman para ijqui quintlajtlacolmacasquej nochimej on yejhuan xotlaneltocaquej ipan on tlen melahuac, yej ocuelitaquej más on tlen xcuajli.

*Nemij tlatlapejpeniltin aquinomej nomaquixtisquej*

13 Pero nonequi nochipa ticmacasquej tlaxtlahuijli Dios nemopampa, nocnihuan

---

† 2:5 todavía; sanquen ‡ 2:7 secreto § 2:10 cosas

yejhuan toTeco mechtlajsojtl‡, pampa Dios omechtlapejpenij ijcuac nochí quemach otzimpeu. Omechtlapejpenij para nemomaquixtisquej itechcopa on chipahualistli yejhuan on Espíritu Santo mechmaca, niman ican nemotlaneltoc ipan on tlen melahuac. <sup>14</sup> Dios omechnotz para nenquipiasquej yejhua in itechcopa on cuajli tlajtojli yejhuan quitemaca temaquixtilistli, yejhuan tejhuamej temechmachtiaj, para no tohuan nenquiselisquej on ihueyilis toTeco Jesucristo.

<sup>15</sup> Yejhua ica, nocnihuan, xmo yolchicahuacan ipan nemotlaneltoc, niman xquejehuacan on temachtijli yejhuan otomechijlijquej ijcuac tinemiyaj nemohuan niman yejhuan otomechtlajcuilolmacaquej. <sup>16</sup> Ma sa no toTeco Jesucristo, niman Dios toTajzin, yejhuan techtlajsojtl‡ niman ican iteicnelilis† otechmacac yolehualistli para nochipa niman se cuajli tlamachalistli‡, <sup>17</sup> ma mechyolehua niman ma mechmelajcatlali para nenquijtosquej niman nenquichihuasquej nochí tlen cuajli.

### 3

#### *Pablo quitlajtlani oración*

<sup>1</sup> Sa ica nochí, nocnihuan, xchihuacan oración topampa para on itemachtil toTeco nimantzin ma nochayahua, niman ma quiselican ican tetlacaclistli, ijcon quen onochiu nemotzajlan. <sup>2</sup> No xchihuacan oración para ma techmanahui intech on xcuajcualtin tlacamej niman on yejhuan

---

\* **2:13** les ama   † **2:16** su misericordia   ‡ **2:16** esperanza

cuejhuelitaj quichihuaj on tlen xcuajli, pampa xnochimej quipiaj tlaneltoctli.

<sup>3</sup> Pero toTeco nochipa quichihua tlen qui-jtohua. Niman yejhua mechyolchicahuas niman mechmanahuis itech on diablo. <sup>4</sup> Niman pampa, nemejhuamej niman tejhuamej titlaneltocaj itech toTeco, tictlaliaj toyoljo nemotech ica nemejhuamej nenquichihuaj niman nenquichij-tiasquej on tlen temehnahuatiaj. <sup>5</sup> Ma toTeco mechpalehui para más nenquimatisquej on itet-lajsojtlalis\* Dios niman para nenquipiasquej iijy-ohuilis Cristo.

### *Nonequi tequitisquej*

<sup>6</sup> Nocnihuan, temehnahuatiaj ican itocatzin toTeco Jesucristo, para xtlalcahuican san aquinon tocniu yejhuan xquinequi tequitis niman yejhuan xnohuica cuajli ihuan on temachtijli yejhuan tejhuamej otomechmacaquej. <sup>7</sup> Nemejhuamej nenquimatztoquej quen ijqui nonequi nennemisquej para nenquitocasquej toejemplo. Ijcuac tejhuamej otinenquej nemohuan, otitequitquej. <sup>8</sup> Niman xacaj oticualijquej tlaxcajli yejhuan xotictlaxtlahuiliqquej. Yej otitequitquej ican tonajli niman yehuajli para nion aquin de nemejhuamej otictequimacaquej. <sup>9</sup> Masqui tejhuamej techtocarohuaya para temechtlajtlanilisquej xtechpalehuican, otitequitquej para otomechmacaquej on ejemplo para nenquitocasquej. <sup>10</sup> Pampa ijcuac nemohuan tinemiyaj, otomechmacaquej yejhua in tlanahuatiijli: “Yejhuan xquinequis tequitis, ma

---

\* <sup>3:5</sup> su amor

ca ma tlacua.” <sup>11</sup> Aman techijliaj ica sequimej de nemejhuamej xtequitij ipan on tequitl yejhuan para notequipanosquej, pero notequimacaj ica on yejhuan xnonequi para quichihuasquej. <sup>12</sup> Quenimej tlacamej tiquinnahuatiaj niman tiquinchicajcailliaj ipan itlanahuatil toTeco Jesucristo, ma tequitican ica cuajloticaj para huelis quipiasquej on tlen ica notequipanosquej.

<sup>13</sup> Nocnihuan, ma ca xsiahuican para nen-quichihuasquej on tlen cuajli. <sup>14</sup> Tla yacaj xquitencaquej yejhua in tlinon tiquijtohuaj ipan in tla-jcuilolamatl, xpiacan cuidado aquinon, niman ma ca sa xchihuilican cuenta para ijqui ma pinhua. <sup>15</sup> Pero ma ca xpiacan quen nemotlahuelicniu, yej xtacanonotzacan quen yacaj nemocniu.

### *Sa ica nochitlatiochihualistli*

<sup>16</sup> Niman sa no toTeco, yejhuan itech tzimpe-hua on yolsehuilistli, ma mechmaca yolsehuilistli nochipa niman ican nochitl tlen sesetlamantic nochihuas. Ma toTeco nochimej nemohuan ma nemi.

<sup>17</sup> Yejhua in tlajpalohuilstli nejhua, Pablo, ne-mechtlajcuilhuiya ican noma. Ijquin nemechititia ica melahuac in notlajcuilolamahuan. Ijquin niquipcuilohua.

<sup>18</sup> Ma toTeco Jesucristo mechtiochihua nemochimej<sup>†</sup> nemejhuamej. Ma ijqui nochihuua.

---

<sup>†</sup> **3:18** todos ustedes; nannochti, yemochimej, anochimej, in-nochimej, emmochimej

**In yencuic iyectlajtoltzin Dios itech ica  
toTeco Jesucristo  
New Testament in Nahuatl, Guerrero  
(MX:ngu:Nahuatl, Guerrero)**

copyright © 1987 Wycliffe Bible Translators, Inc.

Language: Nahuatl, Guerrero

Translation by: Wycliffe Bible Translators, Inc.

Náhuatl, Guerrero [ngu], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Nahuatl, Guerrero

**© 1987, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

f85e296d-89bd-5d7f-b7c2-328bd8e643b1